



Mensajem Loron Internasional Feto nian 2017

S.E. Primeiru-Ministru Dr Rui Maria de Araújo

Tinan-tinan, iha loron 8 fulan-marsu, Timor-Leste no ema hotu iha mundu tomak, celebra Loron Internasionál Feto nian.

Maluk feto Timoroan mesak forte, reziliente no iha knaar boot ba libertasaun ita-nia rain. Maluk feto sira kontinua nafatin kaer knaar importante iha dezvoltamentu sustentavel nian. Maibé, to'o ohin loron, ita seidauk iha igualdade jéneru iha ita-nia sosiedade, maske ita haka'as an daudaun ona hodi hadi'a ida ne'e.

Iha ita-nia leet, ita haree dezigualdade akontese. Husi dadeersan sedu de'it, molok mane no labarik mane sira hadeer, feto maluk no mós alin feto sira hadeer sedu ona hodi prepara ai-han ba família tomak, ba kuru bee no mós buka ai-maran, no garante katak labarik sira sei ba duni eskola. Ida ne'e hanesan parte ida husi serbisu loron-loron nian, molok sira kontinua halo serbisu uma-laran, iha to'os ka natar-laran, iha serbisu fatin, halo sira nia negósiu ki'ik, ka kontribui ba serbisu sira seluk hanesan servisu formál no mós informál.

Serbisu sira ne'ebé feto maluk no labarik feto sira halo iha sira nia uma-laran molok oras serbisu nian hahú, dala barak la sura no ladun hetan valór. Ita dala barak ladun apresia no konsidera serbisu ne'ebé maka feto sira halo ona.

Maibé, hanesan parte ida husi Loron Internasionál Feto nian iha tinan 2017, ita presiza atu reflète ba-ihá mudansa knaar feto sira nian iha mundu serbisu ohin loron.

Timor-Leste nu'udar nasaun ida ne'ebé mak iha hela tranzisaun nia laran no ita agora hakarak muda husi sosiedade ne'ebé subsisténsia no tradisionál ba-ihá sosiedade ida ne'ebé modernu.

Parte ida husi tranzisaun ne'e maka presiza ita atu harii Timor-Leste sai nu'udar fatin ida ne'ebé iha espetativa ba feto no labarik feto sira, la'os de'it atu te'in, fase roupa, haree labarik no mós haree ferik ho katuas sira, maibé mós atubele partisipa iha moris públiku nian.

Ita hakarak atu kria sosiedade Timorensé ida ne'ebé inkluzivu hodi envolve mós ita-nia membru populasaun sorin-balu husi feto maluk sira, hodi bele ativa no ho direitu hanesan hodi partisipa iha merkadu serbisu nian.

Iha loron internasionál feto nian tinan ida ne'e, hanesan mane ida, aman ida, no mós Primeiru-Ministru ba Timor-Leste nian, ha'u nia mensajen ba mane no labarik mane sira katak, ita presiza iha knaar ne'ebé ativu liután hodi fó apoiu no fasilita fortalecimentu sosiál no mós ekonomia maluk feto sira nian.

Todan tenke fahe hanesan entre mane no feto sira.

Wainhira ita iha sosiedade ida ne'ebé mak iha igualdade jéneru, ita sei halo ita-nia rai Timor-Leste ne'e produtivu liu no prontu atu hasoru dezafiu sira hout kona-ba konstrusaun Estadu ho Nasaun.

Hamutuk ita bele, ida ba hotu, hotu-hotu ba ida!

Mane hamutuk ho feto lori Timor-Leste ba igualdade jéneru iha 2030.